

靜

娛

亭

筆

記

靜娛亭筆記目錄

卷七

宰相工詩

江西熊氏科第

熊太史名言

儒臣膺武功爵

六忍

東山談苑

名聯

才人命薄可憐

詩中巧搭

戒溺女

吳西林居士

高西園

老僕詩

忠孝縣令

論徐張二公相業

吏難

潘少白先生

潘四農先生

靜娛亭筆記卷七

賀縣張培仁鑄菴

宰相工詩

漢軍高文良公

其傳

字章之由翰林歷任封圻官戶

部尙書大學士有味和堂集詩筆出入樊南劍南之間才翁所云誰信牙旂八州督一生辛苦似書生良不誣也射堂云調馬馴鷹意未慵射堂碁墅日從容冠飄孔翠天風紉衣染鵝黃御氣濃煮酪覓尋關外水看雲遙指仗間峰應嗤頭白簪書客名紙生毛筆

退鋒按此詩至今已傳播藝林矣予尤愛其夏日雜  
感詩云一臥蕭齋懶竟成經旬今起下階行日方可  
畏如宣孟門亦長局類士衡寒儉文章慚象管黑甜  
滋味泥桃笙年來久負歸耕志誰識看雲不語情意  
緒間如退院僧當闕謝客少晨興長腰米未來江左  
蟠腹瓜誰餉少陵漢落未妨呼潦倒清羸翻覺耐炎  
蒸書生自分長甘耳欲給侏儒却未能一聲牧笛送  
朝曦屋角明河拂地垂短夜徂如生計迫涼秋望似  
遠書遲蛛絲競巧無人處螢火爭光墮月時笑汝區

匣空自喜露寒霜白欲依誰等間此事不相關造物  
應多笑我頑舊雨過門同泛梗新雲變態似移山素  
心擬託三珠樹時樣梳成一尺鬟青瑣西南最惆悵  
粗才頻綴近臣班急裝千騎扈鳴鑾馳道遙通十八  
盤赤羽射生隨夜火黃門飛鞚趣朝餐平時暑月宮  
衣重一夕邊風翠幕寒辛苦從王男子業自慙樗散  
臥長安曾識羊曇乞墅身早開甲第換朱輪拜塵車  
下多名士行馬門前斷舊人諫議豈應疏貢禹征西  
空解重王珣十年回首依東閣不會平津是要津動

定由來祇信天羊腸故道著先鞭驂驢跨竈還如虎  
雞犬升雲豈是仙舊學未諳因熱爨新晴只想就涼  
眠傍人頗笑應官懶挂籍金閨亦偶然夏日偕同人  
城南看花云沙路緣溪曲風帘出柳斜踏青誰信馬  
迷路忽逢花村靜聞吳語泉香試越茶脩然遠塵俗  
偏愛野人家淺酌新篛酒平攤小樣瓊萬株紅藥艷  
一幕碧天圓醉可留花下春仍在眼前題詩誰第一  
小謝有新篇曲欄憑已徧欲去更夷猶青嶂收殘雨  
斜陽在小樓交新重握手花好重回頭明日無塵事

還期挈榼游

江西熊氏科第

康熙年間宋牧仲先生撫江右時熊大司空一瀟里

居中丞招飲滕王閣觀競渡熊司空之子滌齋太史

時方九歲侍宴中丞卽席命賦五言律一首稱賞久

之滌齋年十五舉康熙己卯鄉試丙戌成進士入詞

林滌齋之子雲亭中丞學朋年十八舉雍正甲辰鄉

試庚戌成進士蔗泉觀察學驥年十五舉乾隆庚午

鄉試甲戌成進士雲亭子敷時西山二先生一舉乾



隆甲子一舉乾隆丙午皆年甫踰冠數時丁丑成進士一門科第蟬聯滌齋翁幼識王漁洋先生年登大壽乾隆丙戌重赴瓊林

熊太史名言

人有求於我、力能應則應之、如勢有所不能、當和顏以告之、不可疾言怒色、拒之太嚴、更不可託故延展、令人失望、悞事。

人當危難之際、得善人一語解紛、增多少福澤、王導緘口則周顗死、李白緩頰則郭子儀生、仁人之言、其

利溥哉

儒臣膺武功爵

仁和孫文靖公

士毅

由

召試得中書乾隆辛巳成

進士入翰林官至大學士以戡定安南功特封一

等謀勇公賞戴雙眼花翎紅寶石頂太谷溫制軍

承恩

以乾隆丁酉拔貢官至直隸總督加經略銜勦

逆匪林清餘孽此乾嘉中漢大臣之膺武功爵者近

日則湘鄉曾文正公道光戊戌進士入翰林以平洪

逆功封一等毅勇侯賞戴雙眼花翎其弟沅浦制

軍亦封威毅伯合肥李少荃節相以平洪逆功及平  
捻逆功封一等肅毅伯其兄小泉制府亦官兩湖總  
督湘陰左季高節相道光壬辰舉人官至大學士以  
平新疆回逆功封恪靖侯按以舉人而大拜者自明  
至今惟左相一人尤爲異數

嘉慶年間貴州劉朗渠先生

清

以拔貢生

朝考一

等得知縣分發四川由軍功起家歷升至山東鹽運  
使自請改武 特旨授登萊總兵以文改武奇矣咸  
同之間衡陽彭雪芹先生以諸生從戎統帶水師多

年屢著戰績 特旨授長江水師提督先生疏辭曾  
文正公奏其有文武材且以諸生得道員宜歸文職  
遂授兵部侍郎以武改文尤奇矣

### 六忍

淄川楊宏道著六忍說曰一曰忍觸觸者人犯我也  
二曰忍辱辱者人凌我也三曰忍惡惡者人憎我也  
四曰忍怒怒則憎之重也五曰忍忽忽則憎而發之  
輕也六曰忍欲欲則貪而不知止也此六忍者戒之  
一身則一身安戒之一家則一家安推之以處人己

之間則所遇皆安而悔尤寡矣

東山談苑

莆田余澹心先生懷著東山談苑多記盛德事及名

人逸事今摘錄數條

范文貞公景文爲南大司馬時好客士有以詩文投

謁者無論工拙必自首至尾細加披閱次日向其人

言之一字無漏佳者每加嘆賞各有餘潤此余從旁

親見者

張副憲瑋居官廉潔公服常在質庫中常謂人曰爲

清官甚難必妻子奴僕皆肯爲清官而後清官可爲不然則敗其守矣

錢副使

棟

官南京吏部時當云少年登第未嘗讀書

實爲不幸乃自立課程每日清晨誦五經四葉熟後乃理事午後讀史二十葉及古人詩文數篇皆潛心諷詠興到或作古文或賦詩至子夜乃就寢每日皆如是

此公與予同僻

朱子方與諸生講學有報至乃視職罷祠之信先生

閱畢仍坐講如初辭色更爲和平

伊川先生曰君子之於人也當於有過中求無過不當於無過中求有過

京山王汝化年九十餘再遊峨嵋遇道人飛霞先生授吐納服食之術百餘歲後鬚髮轉黑腰帶倍人沈啟南風神散朗骨格清奇碧眼長鬚望者疑爲神仙所居極水竹園館之美藝鼎圖書紛列座右佳賓良友戶外之屨常滿興至則揮灑雲煙琳琅滿幅畫成又自題詩其上風流文采照映一時

王元美尙書晚年謂人曰吾心知績溪之功爲華亭所壓而不能白其枉薄新安之文爲江陵所脇而不能正其說此平生兩違心事

張紫陽事扶風馬節度

默

於河東馬公初不知其所

長及被召赴京行有日矣紫陽謁見以悟真篇授之曰平生所學盡在是矣願公流布此書當有因書而會意者

因書會意之人殊不易得

楊廉夫居鐵厓山山中有綠萼梅數百株築層樓以



玩之被羽衣吹鐵笛值元明鼎革之際諸名士出就徵聘者半皆不得其死先生獨超然塵埃之外極江山風月之樂

名聯

通州徐樹人中丞

宗幹

自題其山齋一聯云日出時

月上初雨後雪中得無限好詩好畫書數卷棋半局  
爐香琴韻到此間成佛成仙

才人命薄可憐

李香萃停雲閣詩話云閨怨詩多風人寄託嘗見江

西符梅修大令

鼎庸

四律細意熨貼怨而不怒蓋罷

官後作也詩云寂寞房櫳思惘然薄寒如水暝如煙

分無好夢傳飛燕信有詩魂託杜鵑鏡面芙蓉成往

日陌頭楊柳又經年茶餘飯後都無著第一難禁似

酒邊記得星軺曉度關幾行環珮響珊珊迎來月殿

神仙侶擁出霓裳待從班垂手客依金瑱闥

此言薦家人

比肩人訂玉連環

此言薦落友

誰知翠繞珠圍地早種愁

根到此間宛轉相隨日未多忽教佳會阻銀河離天

莫補媧皇石苦海平添伍相波從此因緣歸夢蝶可

堪謠詠起修蛾嫁衣典盡琴猶在不許君前緩緩歌

一例明眸皓齒身果誰巧笑果誰鬢時樂昌仁化英德均被賊破城

事後無被參者妍娘是否無成見無成見三字大府口中語恩怨分明有

夙因紅豆聽殘林下曲碧簫閑煞倚樓人華年我亦

甘虛擲辜負朱門大好春大令春闈得意時闌卷極

為主司所激賞有曲江風度之評到粵後卽署曲江

縣亦奇及罷官旋里過曲江長嘆一聲投水而死

貧士生涯冀博一官以爲仰事俯畜之資如此結

局其實可憐可嘆四詩詞旨哀艷是辨香玉溪生

者詩中最可嘆者。妍媸恩怨一聯。所云樂昌等賦。均被賊破。無一參者。獨參符君。當道未能憐才。亦無主持公道者。同罪異罰。何以肅吏治耶。采風者。達之於上。庶有感乎。

如此才華。忍使之終身消棄乎。

寄心菴詩話云。江都王仲清秀才。前妻困棘闥。甲申秋。貽書友人。作別於平山堂。下赴水死。數日前用僻韻作詩三十首。中有句云。放顛未敢頻耽酒。沽直何須轉乞醺。書味美於新娶婦。文場拙似倒繙孩。殘書徒飽千年蠹。敝服猶懸百結鴉。寒酸况味蜂鑽紙。貧

賤生涯虱處禪。人言佳境同甘蔗。我嘆浮生似苦瓊。  
傷心我欲投東海。撒手人都聚北邙。和靖佳兒惟白  
鶴。仲翔弔客有青蠅。行樂及今歌蟋蟀。偷生從古嘆  
蜉蝣。皆險而能工。百感茫茫久有死。志可悲也。

予謂此人較符大令更屬可憐。因其久困名場。不  
能博一第以自慰也。符大令以文字見賞。宗工掇  
巍科宰劇邑。可謂文字有靈矣。仲清因處窮。應意  
其景況必竭蹶不堪。乃從屈子游耶。抑別有故而  
爲此耶。此窮士之苦也。若修梅則達矣。乃一官落

拓不得已亦從屈子游趙甌北詩腐儒爲吏拙貧  
宦事人難良然當此之時士有窮達兩難之慮豈  
非世道之憂二公皆負才倘入玉堂定堪稱職卽  
爲入幕之賓必非不舞之鶴乃俱因抑鬱以至於  
自盡嗚呼是誰之過歟

詩中巧搭

吳門有聯句之局題在籤筒內每人各掣一籤事或  
雅俗懸殊或巨細不類必合爲一聯取其逼肖是物  
對偶則銖兩悉稱者爲勝大似時文中之無情搭題

非腹笥富而心兵練者不能制勝宜黃陳少香大令  
常與客舉斯會掣得袈裟卽云方外可知無正服友  
掣得囚車卽云此中幾見有完人少香掣得曉妝卽  
云雲開寶鏡籠燐翼友人掣得侍衛卽云風閃峩冠  
動雀翎又掣得告示卽云鄉老昂頭看日月友人掣  
得放屁卽云通人掩鼻嘆文章又掣得朝珠卽云明  
戴天顏垂一串友掣得抹胸卽對云暗藏春色峙雙  
峯又掣得修脚者卽云足下工夫三寸鐵友人云掣  
得題名錄卽云眼前身價一文錢俱有思致

舊傳端午節對 孔林云赤帝驕人重午節素王  
去我二千年魁星對頂蓬云曾經彩筆干牛斗不  
許空落燕泥俱佳妙在不露題面而恰是此物心  
靈手敏足以啟後學心思

### 戒溺女

江西多溺女之風以故男子每艱於得婦山東郭瑯  
菴廷翁有詩云昨見有男子年將四十少時卽商於  
外時寄資歸以養其父母其父母因爲娶婦喚之回  
至則見其婦身材甚小問之年甫十二遂怒而棄之



仍商於外戲作一詩爲其婦挽之詩云妾年十二郎  
四十郎長妾短郎不喜出門不顧不敢嗔十年不歸  
妾成人却恨人無十年好妾成人時郎已老郎心若  
比妾心堅回家好待兩三年讀之酸楚

吳西林居士

寄心菴詩話吳西林居士穎芳結茅錢塘江上不求

仕進詩高曠絕俗有空山木落石氣自青之境其論  
詩云古之人讀書不專於務詞章偶爾流露謳吟僅  
抒所蓄之一二耳其中所蓄淵乎其莫測也遞降而

下傾瀉漸多逮至元明以十分之學作十分之詩無  
餘蘊矣次焉者或溢其量以出故其經營之處微露  
不足如舉重械雖同一運用而勞逸之態各異其致

### 高西園

盧雅雨先生云轉運兩淮高西園鳳翰方以縣丞委

管秦壩掣秤俸滿應敘升矣會儀徵缺出薦於兩臺  
制府復書尙稱聞其才名曾有構予於制府者乃轉  
以結黨爲予罪劾鳳翰並及予故鳳翰詩云幾曾連  
茹茅同拔却爲鋤蘭蕙並傷又云不妨李固終成黨

到底曾參未殺人皆實錄也制府之顛倒是非可勝嘆哉

老僕詩

臨潼張漁川大令 四科 僑康揚州築讓圃於天甯寺側與馬嶰谷行菴爲隣有老僕詩云吾衰底處覺一僕髯先皤曠役身常病應門語每訛肯因無用棄終念服勤多衣食休嫌薄餘年更若何此仁人之言可與吳野人新僕詩並稱絕調

忠孝縣令

丹徒田大令通稟稿云敬稟者竊卑職蓬門下士忝  
竊科名、捧檄已遲、祿不逮父、所可奉侍者、惟一母、年  
已七旬、有七、咸豐四年、揀發到省、迎養來蘇、菽水承  
歡、稍申烏哺、九年八月、承乏丹徒、老母僑寓吳會、十  
年四月、因蘇州告警、挈眷還鄉、其後賊勢猖獗、蘇常  
迭陷、鎮城孤懸、江表岌岌可危、老母數從間道寄書  
時相慰勉、且手諭戒之曰、汝書生、幸司民牧、臨危授  
命、義無可辭、倘鎮江有事、而汝臨難偷生、或鎮江無  
事、而託故交卸、皆非吾子也、故卑職署丹徒四十月

雖公私萬分竭蹶、不敢存畏難規避之心、逆匪節次  
圍城、晝夜登埤守禦、少則數日、多則十餘日、得以定  
神識、置死生於度外者、秉母氏之訓也、上年九月、原  
籍山陰縣、被賊竄踞、各鄉義民接戰不利、卑職廬舍  
被焚、老母妻子避居諸暨縣之包村、卑職今春得信、  
差人往接、而包村先已被圍、守候多日、不能前進、七  
月間、聞包村被陷、卽欲乞假尋親、特恐以託辭規避  
見疑、不獲俯如所請、且卑職母教素嚴、丹徒一任、不  
許託故交卸、徬徨瞻顧、五內焚如、以至每日嘔血、至

今未嘗荷蒙恩施優渥。謁署泰州。在憲台無規避苦  
缺之疑。在卑職無違犯老母教令之責。則卑職得行  
其志矣。夫人臣委質義在致身。此爲不避危難而言。  
非謂平日置其親於不問也。古人有親陷賊中。終身  
不事婚宦者。卑職亦人子也。老母日薄桑榆。就使安  
順處常。固已懼多喜少。何況干戈滿地。消息全無。卽  
或幸保平安。其驚恐憂愁。飢寒交迫。在所不免。勢等  
倒懸。危如朝露。而卑職事上接下。談笑從容。晏然若  
無其事。天高地厚。何以自容。卑職身爲人子。於老母

顛沛流離之際既不獲扶持其旁又不能速爲援救徒以入死出生之事屬望於轉託之人是猶父母有疾而欲剗他人之股以療之也是卑職之有母與否尙在未定爲老母思之已無卑職之子矣興言及此其忍忘親而適彼樂郊乎伏惟中堂大人推仁錫類教孝作忠籲求給假數月將秦州印務另行委員署理卑職得以力疾尋親倘蒙福庇老母平安脫離賊境卑職之心自安病亦必痊容銷假當差另求驅策有生之日無非戴德之年草木有心敢忘報稱否則

亦惟獨行其志。客俟老母得有確信。再行束身歸罪。聽候嚴參。臨稟涕泣。不知所云。

江蘇巡撫部院李批。據稟已悉。該縣協守鎮城。孤危窮苦。三載於茲。軍民交頌。本部院博訪輿論。殊深佩慰。是以緘商江藩司。調署泰州。以資佐理。而彰公道。並擬會同督部堂。專疏保薦。爲吾蘇官場喫苦者勸。取巧者愧。不知有七旬老母。尙陷賊中也。包村失陷。信息全無。爲人子者。何以堪此。然未調署之先。不敢違母命。而藉故規避。旣調署之



後不肯戀優缺而乞假尋親忠孝大節委曲求全  
高義至性欽佩曷已應如稟給假四個月再行回  
省當差候飭江藩司另委賢員署理泰州印務仍  
錄批通報督部堂暨江藩司查考此

加批 稟詞係該令手稿抑係何人代擬卽據實  
稟覆李令伯陳情表不能如此沉痛近述慈訓真  
天下之賢母也有是母乃有是子當益勉爲循良  
清白吏以發名成業也

至性至情不愧爲忠孝男子三復之不禁流涕盈

襟、按此稟從寰宇瑣記抄出不錄田大令之名  
可惜也

論徐張二公相業

天下仁者或未必智、而智者無不仁、蓋洞徹乎天理  
人情之際、然後能補偏救弊、易危爲安、使隘苦者舒  
抑鬱者伸、神奸巨蠹、黨羽眾多、能呼吸之間、移主意  
者、卒莫能售其技、彼迂齷者、徒悻悻太息於僨事之  
後耶、明徐文貞公附當國時事、明世宗猜疑忌刻之  
主、繼奸相是非倒置之後、卒能挽回元氣、開示公道、

世宗末年、代草遺詔、一洗苛政、眞聖賢經濟、菩薩神通也、偶見王鳳洲先生祭公文、實足以表公之生平、錄之以申景仰之私、文云、嗚呼君攬治綱、相參治權、宏治之末、孝皇籲天、天之答之、公實產焉、嘉靖之初、世皇臨軒、公之答之、射策哀然、入擅三長、出試百艱、晚握大斗、與天周旋、盡塞倖穴、獨留化源、彌留一詔、雷雨九垓、浴日麗空、轉坤旋乾、遜序成歸、凡十六年、如裴如富、徜徉洛城、樹表遠邇、繫時重輕、公所損益、今猶國經、公所樹培、今猶國楨、始奉帝命、惠我黔蒸、

九九爲期、功圖行成、母念人世、人世濁昏、鞭虹馭箕、  
以還玉京、公之勲德、王言是馮、國史藏蠟、口碑流馨、  
不腆爲壽、予小子貞、比於華封、差信而徵、今之醇公、  
可以無贅、始貞弱冠、謁公旅次、笑語從容、傍及六藝、  
尋覩貞文、未允公意、胡乃詰屈、解達爲貴、余謝不敏、  
各行所是、迨執三尺、而抗緹騎、其帥齟齬、奮欲相噬、  
公默調停、毋使狼狽、先君之恩、托葭莩契、惟我先君、  
積忤敗類、貝錦是熾、鎔毀方熾、霆霹紛如、莫可控避、  
公力旣竭、公心恒惴、惟貞兄弟、扶服歸東、寒灰覆盆、

沒齒長終豈無尺書莫適爲通公捧翔陽以挨屯蒙  
貞乃伏闕疏詆奸兇朝拜夕下三臺景從而何數奇  
厄彼狡童公如弗聞宛曲從容雪先君冤錄其舊庸  
獲改卿服安卽幽宮天雄之節濫及小子公謂延祖  
可以起矣移部吳興拜公梓里筐篚不施一刺而已  
公不自德我何敢齒公與深談所然而喜參伍章程  
錯綜名理以及兵事如針投芥達於敝帚亦復莞爾  
貞之叙公文明以正風行水上匪渙而賁往猶感恩  
晚乃知己我宦小達公喜弗勝中遣流言公伏青蠅

我之嗜飲公憂如醒我之甚口公耳如懲歲一造公  
肺腑爲傾擎舟送我徙倚屏營自貞鑿坏甘從道氓  
公貽尺書始留宦情兒子甫薦公眼復青勉以祖武  
期之再鳴貞也涼德與世唳斯語及先君臆淚自垂  
下石何衆拯溺者誰骯髒七尺不受人知歸而顧影  
何所吐奇以是感公思一報之豈無賢哲婷節美志  
矯然獨立脩然遺世世各趨焉以公有賴公任其難  
彼任其易等彼雷霆奚如雨施以是報公冀伸茲意  
三載蝸廬穴蟄淵沉兩造公宇匪閭匪王自守木义

敢薦鮮禽、藿豆壺漿，聊以表忱。公於此時，不墮中陰，或享鈞天，或棲寶林，肯遊人間，俯爲我歆。不盡者辭，不泯者心。嗚呼哀哉。

張江陵相國

居正

幹濟如李贊皇，而一切振衰祛弊

爲國家計久遠者，似又過之。以其權之專而濟其才之大也。任用王崇古、戚繼光，而邊烽漸熄。因把漢那吉之降，藉以撫綏蒙古。因其崇信佛教，爲之利導，以銷其尙戰好殺之風。終明之世，山西一帶與蒙古接壤者，中外晏然貼伏。至今猶相安於無事，皆江陵當

國籌度之功、其利溥而遠矣、此聖人所以時思管仲  
之仁也、惟其挾震主之威、又高自期許、當國旣久、不  
無過舉、斂怨已深、身後之譏毀百出、究非平心之公  
論也、鳳洲先生亦有祭文於先生、無愧詞、江陵有生  
氣矣、文云、嗚呼有君以來、恭己垂裳、以勞付臣、孰如  
我皇、有臣以來、盡瘁代終、以逸歸君、孰如我公、公秉  
化樞、垂及一紀、盡掃醜敵、與民更始、橐籥含機、太阿  
養光、嘘爲春風、拂爲秋霜、百辟洗心、夙夜乃職、有蠹  
必洗、靡吐敢匿、片紙萬里、一嘖千憂、精神響應、疾於



置郵如日麗空何幽不顯譬彼景風何草不偃河漕  
萬艘先期委輸武騎千羣無煩秣餼大農白粲少府  
繕錢其崇若山其輸踰淵百粍九邊士飽馬騰匯爲  
湯池鬱爲金城單于解轡越裳重譯黃屋之尊與天  
曷極遂超太傅眞拜太師上冠三台下綜百揆詔書  
不名猶日子房彼鄴彼留亦莫敢望公有家嚴貴並  
師臣生死九命榮哀一身公有慈闈通籍兩宮月鮮  
虛賜食必上供九有趨蹌八方駢軌如何一木萬事  
長已嗚呼浴日補天挽化回元簡自帝心播自王言

顯融昭明光大寵靈載之掾史勒之口銘世有頌聲  
曰周曰伊我弗敢從汙不至私在唐贊皇復爲元之  
才惟戡難勳表救時惟余跼弛世一長物公汰衆毀  
彼寄我鉞拙於避嫌竟成鏐金或棄或收雅非公心  
喻訾之口妒我壑邱賴公保全無碍薰修我實憂公  
食少事煩歲杪微詞以當報恩公亦自謂疲於津梁  
褰裳欲從限天一方其言在耳其人不作大斗辭垣  
喬峯隕嶽人亦有言算遠造促嗚呼寄軫巖廊埋魄  
山阿森森象賢爲陟者多帝光常耀國威恆振公神

靜娛亭筆記

卷七

三

行天夫復奚恨、

吏難

王鳳洲先生曰漢法三章卽鄼侯之所增亦無多今則條例愈繁弊愈出上臺之所委讞獄情萬變甲乙之令太煩雖老獄吏亦惴惴然所引恐有所未合於令且有遺漏之虞爲刀筆吏所持以致譴責所以難也漢田賦三十而稅又時賜蠲闕梁山澤之禁多推以予民今歲所登著僅照舊額免催科之責而已稍不足則有情征之譴而民之才悍抗玩上臺者不知部

臣亦若不知寬以俟其自納如不足額操之稍急民  
卽鋌而走險甚至拒殺丁役甚至戕官上官畏其凶  
穢之難過也往往抑官以伸民非曰激變良民卽曰  
辦理不善所以難也漢守令得便宜行事今則自徒  
以上卽取部裁而吏民之爲奸私者百倍於昔偶一  
舉發議者非曰故縱卽曰失察非曰因循卽曰浮躁  
非曰姑息卽曰鍛鍊非有勢力者不能免所以難也  
先言律例之繁紛如亂絲稍不經意卽爲刀筆吏  
所持小則降級大則去官律例之繁是設陷阱人

以爲部胥索賄之具也足以束縛君子令其動輒  
得咎使之不能有所建樹又不足以震懾小人使  
之不敢犯其刁健者轉得藉以行其詭脫及挾制  
之術足知此風之於明之中葉近日粵東有數州  
縣竟有數十年不完錢糧者福建古田惠安等縣  
竟有因官下鄉催征民間抗不賣米欲官之餓死  
者又有投毒藥於井中人飲之初尙不覺數日後  
徧體發五色斑而死者名曰放蛇乾蓋取蛇口之  
毒以藥鍊成者浙江爲文獻之邦天台仙居等處

以抗欠不完屢見戕官之案而並戕其眷屬丁口者又民間完糧多係折錢道光年間每銀一兩值錢二千二三百文民間每兩只完一千六七百文各州縣批解地丁每銀一兩以一正一耗計之連司庫火耗需銀一兩一錢五分卽需錢二千六七百文是州縣每解銀一兩卽需賠錢八九百文若解萬金卽需賠錢八九千串是欲使各州縣蕩產傾家尙不足以填此巨壑也如稍欲議加以免賠累正如先生所言動輒拒殺丁役甚至戕官等事

見矣而抑官伸民者比比皆是而激變良民辦理不善之考語又見矣至末一投云云亦皆常有之事總歸於有勢力者方得脫此奇險也蓋能脫險則必獲利明代之弊政已如此今更甚焉所望於濟世安民之君子矯其弊而改弦易轍焉官困蘇而民事自理否則勢必日甚一日尙欲於此中求龔黃魯卓乎致昇平之效乎

先生爲明七子之冠人第知其博學工詩文而不知其抱經世之畧官雖達鬱而不能伸者猶多也

此文憂時念切不得已而言非洞悉人情通達敢  
體者不能道是謂之真名士

潘少白先生

潘謩字少白浙江會稽人性恬曠工古文終身未嘗  
應試營家人生產弟官廣東知府寄以金亦不受友  
人欲爲置田廬固辭不可嘗有謝諸友書云人心如  
止水微風拂之便易濛濛治之法全在理欲交判之  
界聖人罕言利所謂利者不必富貴利達凡於身有  
安便處皆當體認此處縱一步便駸駸入可欲境界



矣。謔生質故，懶遇謀生之事，往往因循怠惰，境界雖處困乏，覺天地甚曠，人事甚靜，心之所在，無物拂之，非不知老之將至，與溝壑近也。夫溝壑非不可近之地，較心之齟齬者，頗異。任天得之，循道處之，何殊豐養厚葬哉？常人以身安爲樂，君子以心安爲樂。謔雖未學，苟吾心已安，袒斃冰雪中，以畚土掩之，亦樂境也。諸友爲謀田廬，使餘年在耕鑿內，理非不可。然耕鑿本無懷之業，謀而爲之，則心必有所擾，又不得同心之友共處朝夕，日與負耒者計贏絀，衰年餘喘轉。

覺無味敢敬謝諸友申輟茲役使吾以將盡之日乘  
化短長無所滌洞其間似勝於以飽煖終矣

此乃眞鐵漢非若是做不得一件事

潘四農先生

潘德輿字四農江蘇山陽人爲學務躬行不談心性  
嘗曰士居鄉無政教權獨當以文章轉移風俗耳有  
答問云客問曰文於道爲末子每思以文章轉移一  
世何也曰人有不願爲男子而願爲婦人者乎人有  
已爲男子而猶願爲婦人者乎然而今之文士何願

爲婦人者多也、順時而畏其不合、悅人而慮其不工、何其求爲婦人之甚也、推而論之、二百年來之詩文、亦何其男子之氣少、而婦人之眾也、可悲也、予悲之、故欲從而挽之、曰文與行二也、文柔美人剛正、何害、曰文虛也行實也、今虛者尙不敢幾微拂人意、而以順爲正、而謂其實者將特立而不撓於俗、其誰信之、曰此非得已也、士順時則大者弋名位、不順時則衣食且不可謀、而死亡至矣、曰天下之事、萬端義利盡之矣、義利之辨明、大之爲聖賢、次之成忠孝、次之爲

文章之雄、今義利之所以不能辨者、死生惑之也、死生之惑、不能破、雖求爲文章之雄、亦不可得、傳曰、死生有命、此語無一人不知、而無一人知之、果知之、則文章之雄、可以坐致、而聖賢忠孝之塗、乃由此而漸啟焉、然則所論雖不越乎文章、而天下男子廉恥之氣、由此而勃然起、沛然達、則文章者、卽風節之綱維、國家之柱石也、易曰、觀乎人文、以化成天下、又曰、夬決也、剛決柔也、君子道長、小人道消也、卽此義也、客默然退、予次其語、示從吾游者、德輿以知縣分發、

徽需次未得補缺而卒著有養一齋集

惜未見此集

此一篇冰雪文也不知撲去俗塵幾許足以喚醒  
癡聾文人之可貴者其在此乎江西李穆堂常州  
洪稚存見此文自無愧色 四農與少白先生可  
稱潘氏聯璧 議論奇矣而理自平

靜娛亭筆記目錄

卷八

眉公語錄

李邁堂論文

袁侍御名言

東游筆記

李孝廉論種穀

泰西二教宜定一尊

邪教宜防

泰西公議

疑事詢西人

龔少蓮名論

論川鹽

高麗王罪已詔

倉廉訪保全直臣

趙勇畧將軍

靜娛亭筆記卷八

賀縣張培仁子蓮

眉公語錄

陳眉公語錄有足以發人之深省者謹錄於此以當座右銘

靜坐然後知平日之氣浮○守默然後知平日之言躁○  
省事然後知平日之財廢○閉戶然後知平日之交濫○  
寡欲然後知平日之病多○近情然後知平日之念刻○  
讀書然後知平日之識淺○惜陰然後知平日之生虛○

治身如治國家。國家先使無事。以待忠孝之豪傑生。軀殼先使無病。以待修煉之神仙至。

偶與諸友登塔。頂謂云。大抵做向上人。決要士君子鼓舞如此塔。甚高。非與諸君乘興覽眺。必無獨登之理。既上四五級。略有倦意。必須賴諸君憇憩。此去絕頂不遠。既到絕頂。眼界大地。位高又須賴諸君提撕。警覺。跬步少差。易至傾跌。卽此便是向上的榜樣。士君子盡心利濟。使海內人少他不得。卽天亦自然少他不得。卽此便是立命。



名利壞人三尺童子皆知之但好利之弊使人不復顧名而好名之過又有不體人情輕發議論訕朝廷以賣直許陰私以示威嗚呼是可忍孰不可忍

清苦是佳事但能薄於自待不思厚以待人亦未免徒自苦耳可惜只做得半邊工夫

奢者不特用度過侈之謂凡多視多聽多動多言以及作爲無益者皆是浪費精神較之浪費錢財更覺可惜

讀書不獨變人氣質且能養人精神蓋身心爲義理

收攝故也

乘舟而遇逆風見揚帆者無妬念彼自處順於我何  
關我自處逆於彼何與一經計較都是自生煩惱天  
下事大率類此

嘉時吉日和風慶雲不特人多喜色鳥鵲亦有好音  
若夫暴風怒雨疾雷閃電鳥亦深藏人亦閉戶乖戾  
之威令人生畏則上下否隔不通矣故君子以保養  
太和元氣爲主

頤卦以慎言語節飲食爲並重然口之所入者其禍

小口之所出者其罪多故宜加慎

吳俗友朋相見好談新聞顯官亦然並詢及臧獲等輩易開小人媒孽之端予謂地方無新聞可說便是好風俗好世界

捏造歌謠不惟不當聽聽之徒損心術長浮風耳且一聽之則清淨心田中下一不淨種子矣

有穿麻白衣者道遇吉祥善事相與牽而避之勿使相值其事雖小其心則厚

人之交友不出趣味二字有以趣深者有以味勝者

有趣味俱全者有趣味俱乏者雖然甯饒於味無饒於趣

好義者往往曰義憤曰義俠得中則爲正氣太過則爲客氣正氣則事成客氣則事敗朱子曰執拗乖戾者薄命之人也

人生一日或聞一善言見一善行行一善事此日方不虛度

靜坐以觀念頭起處如主人坐堂中看有甚人來自然酬答不差

得意而喜失意而怒便被順逆差遣何曾作得主馬  
牛爲人穿著鼻孔要行則行要止則止不知世上一  
切差遣得我者皆是穿我鼻孔者也自朝至暮自少  
至老其不爲馬牛者幾何

富貴人宜勸他寬聰明人宜勸他厚

只說自家是者其心粗其氣浮

薄福者必刻薄刻薄則福益薄厚福者必寬厚寬厚  
則福益厚

能受善言如市人求利寸積銖累自成富翁

喜時之言多失信怒時之言多失體

後生輩胸中落意氣二字則交游定不得力落文藻二字則讀書必不虛心

待富貴之人不難有禮而難有體待貧賤之人不難有恩而難有禮

閉門卽是深山讀書隨處樂土

以上各條皆粹然儒者之言非可襲取而得蔣心餘九種曲中調侃太甚不知其是何意並以殺毛文龍一事亦歸獄於此老不知毛文龍本有可殺

之處袁崇煥傳中已悉數其罪矣後人欲取觀之  
可殺乎不可殺乎如此軍國重情豈以一山人之  
言以定進止況事屬曖昧何從得其實據想有與  
此老爲仇者架詞以污其名歟

### 李適堂論文

上高李適堂先生

祖陶

與楊客清明府論文書曰夫

文者所以明道亦所以論事也近世之文不及前代  
者非陶一人之私言也見近人文字集中者指不勝  
屈而其所以不如之故亦不僅在於考據駢體之弊

也朝廷之上有直言極諫之臣故賈誼陸贄之徒往往痛哭流涕於章疏草野之間有盱衡抵掌之士故蘇明允陳同甫唐荆川艾千子輩或指時政闕失或復學術之偏頗亦往往確鑿指陳於論策書札序記之間其大者可爲萬世鑒龜其小者亦足爲一時藥石延至我朝康熙中葉此風未息此前代之文之所以盛也今則倪倪怩怩如在雲霧之中始而朝廷之士避之繼而草野之間亦避之始而章奏之文避之繼而序記碑志之文亦避之其初由一二公之忌



刻借語言文字以傾人其後遂積爲千萬人之心傳  
各思斂筆惜墨以避禍士之負聰明才力者無以發  
抒遂各爬疏經義將古人成說已定者仍復顛之倒  
之甚至旁引博徵釋義與二字至三萬言又或借駢  
四儷六之文以示博吾見文人之集惟全謝山尙無  
所避忌故能暢其所欲言其他則皆有許多輪囷結  
齏未能盡吐此今日之文所以衰也蓋古人之文一  
涉筆必有關係於天下國家今人之文一涉筆惟恐  
觸礙於天下國家於此世道人心實有關係鄙人心

竊憂之久矣夫爲文而或至訕上大不可也若乃抱  
惓惓之忠指陳時事欲天下事胥歸於善言者無罪  
聞者足戒矣今人皆不然能不慨哉

袁侍御名言

道光初年楚北袁侍御銑奏請豁免各省地丁錢糧  
宜酌免一二分新賦其舊欠之錢糧必不可免以杜  
刁民有心抗欠以待我 國家十年一次豁免之恩  
此言可謂洞中肯綮乃議者皆京官不知外省州縣  
催科之艱苦乃建議駁斥力詆其請豁免新糧之非計

公鑄級而去此事咸豐初曾文正公亦舉其名言引之於奏牘之中雖未及乎此奏而曾公知之深乃約略及之尙未克詳舉其議論自道光初年以來民欠日多一日合直省計之何止億兆藩司非不知也恐催之過急小民激成事端乃佯爲不知惟責令各縣墊解足數以顧目前之考成而根本之病皆有所不暇計也州縣虧空由此而起害有不勝言者我朝厚澤深仁從不加賦而經費有常何堪此年甚一年之民欠乎袁公陳其言於先曾公舉其名於後當世

靜娛亭筆記

卷八

七

惟張南山先生言之極詳也

東游筆記

偶見無名氏東游筆記蓋紀其往游日本時事中有云日本近日爲強兵之計行三丁抽一之法雖兄弟分居亦不能免民固不願強抽之亦恐無用國政情形向來國王雖有不善臣下不敢諫縱所諫極是亦有應得之罪故偶有諫者皆先自裁而遞遺疏以效史魚之尸諫大官有悞屬官亦不敢言治民之官有悞百姓亦不敢言如此荒謬之習而得綿延至二千

餘年者其君皆據虛位而政歸於權臣所謂其國不爭王位而爭大將軍之位是也大將軍者權臣是也臣執君柄自以刑法攝群下久之遂相習成風卽偶有勝廣之徒起者亦攻大將軍而不及君政雖嚴刻矣然尙不致過於苛剝而民俗之厚亦可見矣今王國號明治廢大將軍之職而自攬其權事事效泰西各種機器無不舉行復用西法以練兵自以爲富強可立待所費旣鉅遂致國用不敷不得不苛斂於民丁稅地稅關稅之外甚至茶棚菜擔無不有稅百計

搜羅一年所入五千餘萬元之多。我中國十八省之地丁錢糧以及鹽釐關稅統計歲入亦不迥如此。乃其地僅當中國二三省之地。徵斂如此之鉅。民力其何以堪。我中國之民涵濡聖德。輕徭薄賦。日在堯天雨露之中。而不知也。帝力於我何有哉。中國之民宜何如勉爲良善。急公奉上。以稍酬高厚於萬一耶。

又云日本國之行鈔票也。當其初行之日。百姓稱便。多願使用。鈔價一元貴至一元二角。人皆購之以其

存携皆便也故民財大半皆歸於官迨後國用不足又勸富家出銀易鈔今之所謂富戶皆紙鈔而已

### 李孝廉論種穀

李邁堂文略內載海鹽朱尚齋太守勸民間之有隙地者種稻之餘兼須種麥與黍以此二穀不甚需水種之較易兼可以濟天時地力之不齊也又云自來教北人種稻者若漢張堪魏劉靖北齊裴延傷宋何承矩元虞集明徐貞明皆徃於其鄉土之利沾沾惟稻是種豈知西北之人慣食黍麥不願食稻以北方

之麥吐花在晝食之足以養人且藝稻之功倍於他穀其難尤在於灌溉此北直之稻田所以難興其實亦不必興也然則京官之祿亦可改米爲麥而兼之以黍矣惟黍麥皆難經久則穀亦不可少今議於天津河間畫地四區一區百萬畝但取十之二營爲水田以種稻可得穀一百六十萬石以備積貯而無旱澇之患其八成先種麥後種黍四區爲田四百萬畝以開方法計之但爲方八十里已得田四百二十四萬畝而溝洫埂堤倉廩屋宇每區各加地方五百畝



總計一百里而已足一區設官司其歲入實諸禰倉以充官課兵糈可抵南漕四百萬之額則漕船運丁可以不用一歲經費可省者又三四百萬兩此邁堂所節錄者惜未見其原文果能行之其利溥哉近日漕米概歸海運其半則解折色果能以折色之銀爲經費從小區辦起能否可行一二年後即可定局如果可行則漸拓而大之小民之生計漸裕北方之水害亦可漸減矣觀於近日之以湘勇淮勇辦疏濬於北方已甚得利

善導者誘掖獎勵之又有經費以利

之何不可  
行之有  
有人議加京官養廉之說緣釐金既設

不趁此機會立國本達人情徒爲經手者中飽之  
資當局者應酬之具豈不可惜哉倘此說不行尙

有一策則議復知縣之行取也知縣實在任十年

並未賦閑者

如因公調省撤任察看等事未經在任十年者不預

准各督撫

保奏推升六部主事內閣中書兩項之官不願者

聽俾歷任既久自必稍有蓄積意圖上進自然洗

手奉公以均甘苦自屬公道但不可以年力就衰

及文理不通者充數耳各員久親民事閱歷已深

將來內轉御史外轉府道一應建言行政自可望其興利除弊否則在京既久俸入太薄無以慰仰事俯育之計則心不安天下未有心不安而能從容展布者也或曰說則善矣不碍及他途之進取乎曰予非欲專用行取一途也况翰苑中人有衡文之職並補道府何碍之有然究不如仍循舊轍而優加廉俸之爲愈

### 泰西二教宜定一尊

偶閱歐洲萬國公法其議論周到平允僕以爲尚未

盡善者彼國之天主教耶穌教猶未別白而定一尊也論其教之先後則創立天主教者皆九死一生百折不回其受禍亦慘矣久之而其教立信從者眾保羅彼得等之功不可沒也乃前人歷盡苦辛祇以供後人逞威權習奢靡恣淫虐之用我中華聖人之教有是事乎亦由彼處之人推尊太過之故以至教王之權勝於各國之主殆淫虐太甚人不能堪敢怨而不敢言知其非者不敢顯斥其非藉其勢者益復張大其勢歐人之受禍酷矣苟非有路得者顯斥其非

自立門戶以與之角耶穌之心能毋惘乎乃教權所  
在卽利藪所在也教王等恐路得之奪其利也乃淫  
刑以懾之殺戮之慘爲亘古四大洲中所未有也大  
傷天地之和者必上下天地之怒彼教中所云永墮  
地獄之說殆爲彼處凶惡之人設乎乃路得之徒亦  
冒九死一生之慘以申其百折不回之念不獨可憐  
亦可敬也二教雖同出一源而一貪一廉一私一公  
一刻一寬一委曲難行一平易近人則二教之是非  
不待智者而決矣歐洲才德之士不少何不於萬國

公法中別白以定一尊禁貪重廉私計去而公道彰則公法一書純乎出於天理之自然必合乎人事之當然矣企予望之惜無人爲予達此言也

### 邪教宜防

天下事有不可解者如近日江浙等省所傳紙人割瓣及夜間幻出各種惡狀空中傳出各種怪聲是也甚有割婦女之乳小兒之莖物者傳說雖不足信亦有見之邸抄者以及鐵算盤之事鑿鑿有之其法非婦女進人家中得水飲之則不驗又須生魂附紙人

而行乃得害其技聞有將紙人拿獲者必有年老婦人登門謝罪必求還其紙人而後已如不從則用危言恐喝嘻此何理哉此等事爲古書所不載中國淺見之徒有疑爲洋人所爲者亦未可盡信鄙意以爲有邪必有正我中國自有正神如果有人受其害者虔誠齋戒呼籲于天卽呼籲于正神之前俾行此邪法者生前盡膺顯戮死必永墮地獄其理灼然萬不能逃

泰西公議

英吉利都城有上下議政院上者官掌之下者紳士  
掌之國有大事王諭相相告上政院公議可否轉告  
下政院詢謀僉同而後行與中國洪範之意暗合民  
閭利弊當興當革者先陳下政院掌院者酌核以次  
上達于王訟獄亦如之刑賞征伐條例諸事官主之  
征稅籌餉紳士主之此誠意美法良矣

疑事詢西人

近日泰西各國刑法極寬而臨陣之時兵各用命足  
徵民風之厚而平日體恤之周訓練之勤亦可見矣



惟聞德俄二國每逢出兵時皆令各軍官各兵勇自備資斧而官不給餉兵亦用命恐未必盡然

德國發奮爲雄竟摧強敵其功誠不世出矣然控勒一國之民使之自備資斧以從事於危地以血肉之軀與火彈相搏同仇敵愾者固多恐未必人人樂從或另有加惠於民使之感奮耶拿破崙保那彼的屢興數十萬之雄師虎視歐境後敗於俄竟喪數十萬之師而民不怨或有別故耶而民風之厚民氣之強若得堯舜文武之君皐夔周召之輔以教以養其所

青如言  
格彼矣可量哉

法國之有自由黨也其心齊其志堅其氣悍百折不  
回與法之官軍相抗其心非盜賊之劫貨財非叛逆  
之謀社稷大約如秦民之苦虐政耳乃屢次起事屢  
遭殺戮暴骨如莽而勢猶未已誠百折不回矣乃不  
料激成一拿破崙竊踞之局拿破崙者假公濟私者  
也竊位之後留意一切政事但知興民之利益而不  
知予民以休養民亦苦矣聆其言則公而明察其人  
則私而暗後竟欲世襲其位使其子孫永爲法國世

襲之主欲卜舉國人情之向背乃下投票之令投票者一百五十餘萬人其爲非者不過二千五百人而已遂卽帝位號拿破崙第一殆亦如四十二萬人之尊王莽耳其好大則秦始皇其虐民瀆武則隋煬帝且盡以其私人爲各國之王而無一人敢斥其罪者後且下令廢會議禁人評論其政務進退大官皆出一人之手蓋自矜者每惡聞其過也所用之大官非其子弟卽其腹心自以爲根基已固矣後大興師伐俄國竟至墨斯科城以俄王宮殿爲行營孰知業已

中計。喪師三十餘萬。而俄兵之亡。亦復不少。此一大  
劫也。哀哉其罪大矣。後俄王興問罪之師。合諸友邦  
轉戰而進。亦至其巴釐司都城。法國破俄國。拿破崙  
縱兵殺掠不堪。乃俄帝亞歷山德第一亦破法國。乃  
禁止殺掠居民。得保其產業。俄仁法暴。相去天淵之  
隔。此拿破破之所以敗亡。俄國之所以興也。

天之所祐。必在仁慈。斷可識矣。

當拿破崙氣燄日張之際。若非英國大將渥爾遜小  
勝之於先。華林登大勝之於後。歐洲大局尙可問哉。

此二人真英雄也

拿破侖之窮兵黷武。飾非拒諫。甚於隋煬帝。後竟賔死窮島。獲保首領以沒。亦云幸矣。所可異者。民之忘其大惡。而稱其小惠。歐洲竟無一人斥其罪者。不可解也。

拿破侖與華盛頓並崛起民間。並登大位。乃一敗而一成者。實一私而一公。一躁而一靜。一惑眾自逞。一保民自歛。自由黨起於法國。其風至今尙在。及華盛頓。苦英國之虐政。立意與英相抗。甚得法人之助。其

助華盛頓者大約自由黨之人居多一變歐洲世及之局其事能行於美利堅而不能行於法蘭西積怨既久乃藉手於德國以洩其忿殆法君降於德而美國公舉統領之局竟行於法國矣而自由黨之遭誅戮而慘死者又不知凡幾應誅乎不應誅乎中外言語不通文字大異譯出之語不能盡達其意且恐略有所諱我華人欲求了然於心亦未易言也其所記遭戮情形真可慘傷歐人最重人命體天心也犯極惡之罪不過一絞罪今自由黨人一概用烏槍擊

死如草薶如禽獮豈真有所不得已耶

龔少蓮名論

金匱龔少蓮

禮

曰夫事勢當流極必返之會昔之所

謂良政皆今之所謂弊政也譬之堂室儼然而棟梁積蠹非易其材而更爲之求不傾覆也難矣況風氣習俗之所趨天時人事之交迫固有不變法不足爲理者聖賢不悖道豪傑不違時勇者不徇小節智者不見小利舉一事以天下爲量建一議以天下爲程亦惟權其緩急輕重以謀之而規於仁與義斯已耳

論川鹽

又白川省煮井爲鹽東則巫山大甬雲陽開縣忠州  
彭水南則鹽源北則南部射洪三台蓬溪綿州東而  
南則富順榮經犍爲井研資州附省則簡州樂至近  
來所出之鹽逾於前十年者數倍是以南濟滇黔北  
入陝甘而食土番回紇諸部落自東南有事淮綱阻  
塞兩楚咸賴川鹽接濟淮綱川運代爲衰旺藉供滬  
注殆天資之以爲殄滅粵匪之用耳可見我國家福祚之宏  
乾隆以後生齒日繁食鹽之人日多求利之人亦日



眾私販之勢日眾官商之勢日孤始則商不敵販繼則官不能制販引鹽不行商皆逃亡官亦賠累而鹽法一壞嘉慶十八年常制軍奏請改課歸丁格於部議責令通融辦理而改配代銷之議起紛紛補苴救過不遑而鹽法再壞道光三十年復奉清查其詳明歸丁者已數十州縣而私販益橫不可緝矣然濱江各關隘猶層層鈐束咸豐三年議以川鹽濟楚川販乘便逐利以私販爲官販公然舟運什百爲羣沿江關隘坐徵私稅擁富巴涪以鹽爲大利後奉文按引

捐輸聽商加價以償所捐每斤加十文私販無捐輸之累有加價之益矣繼而設關於夔以徵販稅明爲化私爲官實則官與販皆以鬻私爲計徵之販者十輸之國者一猶爲有良心者矣是故歸丁之法加價之舉所以縱陸路私販也濟楚之引設關之役所以縱水路私販也欲收其利先除其弊蓋惟知弊明而後除弊力惟除弊明而後興利溥也查川鹽之弊改計歸丁爲之始設關收稅爲之終苟能於入楚境處處設關卽於國課無補尤爲監督者生財之大道乃

自代銷改配之說行一引辦十引之鹽隱射夾帶無從稽查則設關之議亦九泥封函谷之說耳商者課所自出川省領引完課者爲坐商行鹽者爲行商行商本力較厚坐商仰食於行商惟命是從及引積岸疲行商本非領引之人官不能問不得不向坐商比追坐商素貧無可追繳則課皆無著矣引鹽所經官無利焉私鹽所經官之利藪是官與商互爲私也故夾帶之弊則一引之鹽數多至數引影射之弊則已行之引再行未行之鹽而船戶有食鹽橈手有工鹽

比附假託不可悉數有課之鹽十之一無課之鹽十之九矣厥工伙作大處數萬人小亦萬餘人皆聽竈戶指使官稍爲之限制則停煎滋事鹽船撓手更不可數計此而不爲法以治之則日積月多爲害非淺夫設引招商計引征課設官緝私以護商立法可爲善矣不意以計引征課之大利官盜之書役盜之竈與商盜之關與厥盜之私販遂出而顯盜之然第責之竈與商與販及厥員關吏之末是縱大盜而罪小盜也夫計鹽征課與計地徵糧無異計田出賦不聞

征之販米之人何獨於鹽不征於竈而征於商舍其本而逐其末是以官民交困夫唐宋之善權鹽者無他術也亦計竈征課如計田出賦而已川省征竈之法易於征商一日查鹽斤請檢幹練之員分往各廠確查出鹽之井若干熬鹽之竈若干每日出鹽若干核計用費每鹽百斤需工本若干向來鑿井一眼燒鍋一口廠員皆有規利萬不能隱瞞然後統計三年中出鹽之數酌定課額甯失之寬毋失之刻使小人各有所容其法始歷久而不敝一日就出鹽之地設

征課之官第必寬籌公費嚴定賞罰慎毋使除弊之人卽爲作弊之人則得之矣一日編鹽戶以保甲之法設竈正竈長每竈工作幾人燒鍋幾口按月造冊申報由鹽員呈核則鹽井之衰旺竈戶之增減按籍可稽自無隱漏之弊夫征商之法在四塞其爲政也遠而雜故設官多而尙虞其疏征竈之法在一隅其爲政也近而切故官不須多而事易就理且井竈易防而故疏之此商販所以盜民也關隘難防而故嚴之此官吏之所以盜法也或謂私鹽價賤故販者多

若厥地有課恐販者裹足不知厥價之與岍價相去必倍引商便費多而成本重尙且往有所獲旣由出鹽之地定課額而一切均無所費則民且樂爲今日之販不樂爲昔日之商然以征竈之法謀之民則民必以爲便如謀之官與商則阻撓之說起矣彼固世食其利者曷嘗爲天下計哉且查置引征課之法始於明蓋有懲於元末之張士誠方國珍之變而爲之禁制也自此百弊叢生終明之世未得長策我朝仍用明法而變通出之由自國課日裕經商日富

三才圖會  
卷之八  
三  
奈日久弊生不可不亟圖補救也

原本太長間有浮詞略爲刪之使閱者了然於心  
但課歸場竈之說卽以鹽政畀龔君恐亦未易就  
也必十年而後可望

### 高麗王罪已詔

前載無名氏東游筆記深憐日本之民苦於虐政  
而無可控訴也該處離朝鮮甚近常慮其凌暴近  
日泰西人欲與之通商該處之人有固執成規倡  
議拒絕者皆不度德不量力之流甚至有假公濟



私不知話言者旋與日本人相鬥幾釀大禍幸賴  
皇太后

皇上神算諸將用命旋即銷已成之患於無形功  
偉矣德厚矣而朝鮮國王亦能震動恪恭以肅承  
天貺聰明出於憂患焉今錄其罪已詔於後

王諭曰嗚呼予以否德猥託民上十有九年不明厥  
德罪積於上殃集於躬由予所召雖悔曷追粵自嗣  
服以來大興土木勤歛民財使貧富俱困是予之罪  
也屢改錢幣多殺無辜是予之罪也毀撤祠院忠賢

不祀是予之罪也。玩好是求賞賜無節是予之罪也。過信祈禳之事多費國幣是予之罪也。用人不廣宗戚是崇是予之罪也。宮闈不肅婦寺干澤是予之罪也。賄賂公行貪墨不懲窮民愁苦之狀莫達於上是予之罪也。儲胥久虛軍吏失哺貢價積欠市欠市并廢業是予之罪也。聯好各國乃是時宜施措乖方從滋民疑是予之罪也。竟至神怒人怨變端百出下陵其上災及六親上貽天子之憂下擾萬民之生失信於隣國取笑於天下此又予之罪也。嗚呼予罪至

此尙有何面目復對一國臣民乎悲惶愧懼實無南  
面之福惟爾大小臣民肯棄予前過許子自新予將  
洗心滌慮懲前善後從前之政令不便於民者悉令  
除之擇循良吏以牧羣生講究實效思與一國更始  
爾等亦宜各懋乃績告以嘉謨言雖不合必無苛責  
之理庶幾補綴前過共振丕基則宗社之幸也今茲  
天兵渡海亂逆斯討不極其武宥其餘党行將大  
赦國中咸與維新予方悔過何暇責人嗚呼興國恆  
於是亡國恆於是安危之機凜如一髮尙可不戒之

哉茲以腹心諭告想宜知悉 光緒八年七月二十  
日諭 觀其罪已之處過亦不少然人之知過者鮮  
知過而能自改其過者更鮮此諭如出王之手裁亦  
春秋之秦穆公也如出其儒臣之手亦彼國之陸宣  
公也果不至徒託空言則畏天保國王之福未有艾  
矣以視日本之欲耀富强之名先行腴削之政其用  
心之仁與不仁已可知矣夫子刪書所以錄秦誓也  
揆之天理人情後必有驗偶記於此

倉廉訪保全直臣

吾粵謝梅莊先生文章氣節與江西李穆堂先生並  
峙雍正間直聲震朝野其疏劾田文鏡一事瀕於死  
者屢矣幾從明代楊椒山先生游地下矣乃椒山公  
適遇嘉靖之闕而且懷竟戮死西市先生恭逢  
憲皇帝聖明始雖怒其戇而罪之終則鑒其直而不  
殺至今皆頌

憲皇帝之仁明也乾隆間先生受特達之知由諫垣  
擢湖南糧道劾屬員浮收至干巡撫之怒遂據他事  
劾之下先生於獄罪且不測惟時巡撫之勢張甚雖

以合河孫公之嚴正且依違其間而不敢平反是先  
生之再罹難也幸有倉觀察者不肯扶同捏飾以欺  
君上遂據實直陳先生遂得昭雪復官湖南鹽道  
此固聖人在御鑑空衡平不使天下獄情稍有屈  
抑俾直道得伸回邪震懾而倉公之正直無私不念  
舊怨亦爲當代之麟鳳矣譬之百草隨風而靡而貞  
柯獨聳嗚呼何其恕而允也爰表而出之以志景仰  
並錄先生送倉按察之往四川序云昔周濂溪先生  
由分甯簿歷廣東提點刑獄所至以洗冤著而不殺

人以媚人一語遂爲千古之名言夫人卽獻媚何至  
殺人以媚蓋不殺人必將殺已也然有欲殺人而反  
以殺已者亦有不殺人而不但免於殺已者壬戌冬  
余以訪拿衡陽收粮之丁胥及揭參收粮之善化令  
獲罪於王臬司許巡撫被參待理其時府廳州縣之  
在會城者無不希旨謀殺于雖長厚如藩司聲望如  
督院不敢不殺也其不殺者署道倉公而已公之爲  
給練也曾糾余奏事失儀蒙 聖恩免議及其署粮  
道赴岳兌漕也藩司彌縫參欵致書求換府審衡陽

收糧一案之原詳公得書艱然時公之尊人少司寇  
公迎養在岳署見書亦艱然念換詳則結黨欺君  
不換詳則違眾賈禍不得已將藩司之書直揭於漕  
督兩院總督寢其揭恐漕督亦然不得已並將總督  
寢揭之事直揭於部院六科既而總憲據漕咨道揭  
以聞御史又採謗帖譏評入告 皇上命阿少司  
農帶李比部往審並帶胡侍御看審寶鏡高懸山精  
盡現於是督撫藩臬及府廳州縣之與其事者皆落  
職余復蒙 恩補授鹽法長寶道公與侍御亦蒙



恩侍御加級轉兵科給事中公升四川提刑按察司  
當公之一揭再揭也止求轉奏解官奉其尊人潔身  
遠害以去雖逆料余參款內此一款必白亦不料諸  
款之因此盡白而至於此番遷擢尤非意料所及也  
先是少司農諸公審畢還朝公亦回澧州署湖南  
人置萬民衣四襲織四柄作四君子詩送之乞余序  
余引叔向不告免之義辭焉今公之赴任也湖南人  
又作詩以送乞余再三余旣悲舊上司僚屬以詭隨  
被牽連而罹清議又喜公以孤立免禍患而受

主知且喜四川人之得濂溪先生爲提刑也乃直序其事如此至於公前之糾余也余不敢怨公亦不任受怨也後之揭藩揭督以救余也余不敢德公亦不任受德也

讀此文知當世時有偉人能持正理而伸直道此卽活佛活菩薩也文敘次老當一結何等灑脫與倉公濟美於光天化日之下矣

趙勇略將軍

寶應王白田先生學行純粹文品精實讀其祭勇略

將軍趙公良棟文先生以韋布儒留心當世之事知  
儒者入世不外忠恕二字貴在隨時體驗必歸於公  
而後已使先生達而在上必有建樹庶一洗迂疏者  
純盜虛聲之誚惜其晚始遇合未竟其施爲可惜也  
祭文云嗚呼余觀自古奇偉豪傑之士爲國家捍大  
難立大功者未常不爲之咨嗟而太息況乎當世之  
所倚庇生平之所嚮慕而一旦忽焉以沒其盡焉悲  
悼之情又何可極惟公雄毅之才傑魁之略風雲變  
化龍蛇蟠屈非尋常之所測識而忠義果敢之氣至

老而不衰。雖庸夫小子。皆有以信其終身之大節。方  
甯夏之煽亂。奉簡書而捷入。定禍難於毫釐。呼吸之  
閒。蹈春冰。履虎尾。聞其事者。且莫不惴惴而縮慄。及  
其從軍西指。猛氣奮發。料逆孽之可以一戰而擒。而  
憤諸師之畏懦。恒怯。盡無意於報。國於是慨然率  
先。大聲獨唱。聖明之所嘉許。同僚之所忌嫉。猥當  
一路之任。而僅予以疲散飢羸五千之殘卒。直欲借  
名於攻戰。假手於豺虎。苟以快其忿憾。妬媚之私。而  
無所復恤。乃公能以弱摧強。以少克眾。定漢南如反。

奪取成都如拾芥。不啻烈火之燎枯蓬。飄風之捲落葉。固已顛覆巢窟。剖破窟宅。披腹裂股。噉腦磨腸。而承其餘威者。乃得以略取夫毛髮。爪指而自誇。爲不世之業。迨師乘不和。勝負反復。獨以其一身指柱於傾側。擾攘之中。城已危而復固。軍已敗而復全。其夷凶靖亂之功。尤非短才所可及。兩川克定。直抵滇池。其時環寇之師。十萬環城之期。九月咸視之如毒蛇。猛獸之不可向邇。而飽食優游。不復計其何策。以剪滅公。乃相觀形勢。籌度幾宜。聚米畫沙。無不周悉。顧

轉以戾夫蹙縮退步者之心而排沮抑遏不使無鋒  
穎之或出卒之豺牙必厲虺毒潛吹始授公以偏攻  
之任委公以自效之力遂乃鬥生死於穴中決安危  
於幕上芟夷兩寺席卷二橋大破其藩籬盡刈其手  
足由是醜徒震驚瓦解魚潰兇渠授首降幡夜堅曾  
不踰時而掃討七八年來狂狡抗拒之逋賊蓋常考  
其始末公則耕之耘之炊之餽之迨乎啟甑而輟釜  
也乃皆以給於他人而不知誰之所得嗚呼昔之譴  
謫訛溷淆臧否者大抵皆在黑白未分之日苟其

功名成就勒鐘鼎而銘旂常則向者笑譏謔謗亦  
皆舌卷而口塞從未有奇猷偉烈卓然暴著於天下  
而願加之以莫須有之詞誣之以不可活之罪宜乎  
公之扼腕椎心呼天以號泣然而天知吾忠上知  
吾直伏讀褒嘉獎諭之語足以信後世而榮子孫  
彼區區祿秩之崇卑亦何關於得失某誼屬通門情  
關密戚乍聞訃而驚心獨流淚而沾臆乃以知公之  
心之深得公之事之詳竊記序其大綱恐不免於漏  
百而掛一而追思其言談詞氣如在目前庶幾英靈

毅魄不消泯於窀穸而長往來於錦里之旁與商山之側嗚呼哀哉尚饗

此非祭文直頌冤疏也筆曲而達能使將軍轉戰行間一片苦心一腔熱血卒能轉敗局爲勝局殄巨寇以安生靈之情狀活現之於紙上彼忍心害理者始忌其人欲置之於死地終竊其功以邀上賞亦於此文見之矣將軍雖遭阻抑完成大攻以聖明在上也被明代之曾公銑袁公崇煥熊公廷弼又從何處伸冤



趙文敏詞翰

古今才士兼詩書畫三絕者世不多見唐則有鄭虔  
宋則推東坡而元則推趙文敏公東坡竹石多以寫  
意見長文敏則界畫樓臺金碧山水以及人物花鳥  
無不工細似更爲其難也寓意錄中載其與從子玠  
所書自作之詩詞翰雙絕其書不可見矣今錄其詩  
於此聞搗衣云露下碧梧秋滿天砧聲不斷思綿綿  
北來風俗猶存古南度衣冠不及前苜蓿總肥宛騾  
裏琵琶曾泣漢嬋娟人間俯仰成今昔何待他年始

惘然溪上云。溪上東風吹柳花。溪頭春水淨無沙。白  
鷗自信無機事。元鳥猶知有歲華。錦纜牙檣非昨夢。  
鳳笙龍管是誰家。令人苦憶東陵子。擬向田間學種  
瓜。道場山云絕頂清秋。陵翠烟。登臨應費酒如川。平  
生能著幾緇屐。負郭何須二頃田。初日出雲光射地。  
雙溪入湖波接天。升高望遠我所愛。青壁有路何當  
緣。雨華臺云雨華臺上看晴空。萬里風烟入望中。人  
物車書南北混。江山襟帶古今同。昆蟲未蟄霜先隕。  
鳳鳥不鳴江自東。綠髮劉伶緣醉死。往尋荒塚酹西

風海子上卽事云白水青林引興多紅裙翠黛奈愁  
何底從暮醉兼朝醉聊復長歌更短歌輕燕受風迎  
落絮老魚吹浪動新荷餘來溪上扁舟好何日歸休  
理釣簑弁山佑聖宮次孟君復韻云意行騎馬到林  
間晴霧都沉遠近山瓊樹著花春自早翠禽雙語意  
相關一杯到手先成醉萬事無心觸處閑猶欠抱琴  
來托宿靜中規寫水潺潺城南山堂云手種青松一  
萬栽草堂留在翠屏隈推窗綠樹排雲入臨水紅霞  
對鏡開春雉雛迎朝日出暝禽啼處夕陽來山妻也

有幽栖意。數日遲留不肯回。春日言懷云。點點飛花  
欲送春。萋萋芳草正愁人。黃蜂釀蜜經營急。紫燕銜  
泥來去頻。才似茂陵非晚遇。美如曲逆不長貧。久知  
求富都無益。但喜論詩若有神。紀舊游云。二月江南  
鶯亂飛。雜花開樹柳依依。落紅無數迷歌扇。嫩綠多  
情鬥舞衣。金鴨焚香川上暝。畫船擣鼓月中歸。如今  
寂寞東風裡。把酒無言對夕暉。東陽八詠樓云。山城  
秋色靜朝暉。極目登臨未擬歸。羽士曾聞遼鶴語。征  
人又見塞鴻飛。西流二水玻璃合。南去千峰紫翠圍。

如此山川良不惡。休文何事不勝衣。

題畫詩

題畫詩有極佳者。高梧竹石圖云。高人懷抱溫如玉。  
嘉木森森世澤深。何日携琴池館上。月涼重聽鳳凰  
吟。青山疏雨晚來晴。林木蕭條爽氣生。記得當年齋  
館夜。一窗燈火讀書聲。古木修篁出筆端。坐看蒼翠  
逼人寒。分明一片瀟湘趣。他日凌雲集鳳鸞。又山水  
小景云。綠水橋西野岸斜。書聲茅屋是誰家。江南春  
色無心看。閒卻東風杏子花。黃茅渚頭熨斗柄。唐子

好奇曾屢游太湖絕勝能有幾還許我輩閑人收又  
江南農事圖云四月江南農事興漚麻浸穀有常程  
誰言嬌細全無事一夜縑車響到明諸詩如雨過秋  
山蒼翠欲滴

論三國志

崔浩與毛修之論陳壽三國志有古良史風其所著  
述文義典正班史以來無及壽者修之曰昔在蜀中  
聞長老言壽曾爲諸葛亮門下書佐得捷百下故其  
論亮云將略應變非其所長浩乃與論曰承祚之評

亮乃有過美之譽無挾恨之言受捧以肆謗詞必係訛傳之事夫亮之相備也咸以爲英雄奮發之時君臣相得魚水爲喻而不能與曹氏爭天下委棄荊州退入巴蜀困守崎嶇之地稱號邊夷之間此策之下者可與趙佗爲偶以管蕭匹之不亦過乎且亮旣據蜀弗量勢力嚴刑切法控勒蜀人欲以一隅抗衡上國一攻陳倉再攻祁山疏遲失會摧衄而返後入秦川更求野戰魏人以不戰屈之智窮勢盡發病而死由是言之豈合於古之善將者見可而進知難而退

者乎修之亦以爲然此論雖失之過刻然崔浩論議之時去武侯相蜀時不遠已有人議之如此然其拔賢才於淹滯肅紀綱於上下功在當時譽流後世的是儒者氣象也

### 周雲臺

甯鄉周雲臺先生

銑勳

嘉慶辛酉拔貢客粵西最久

工詩出入義山劍南間雖不及度西之雄放而精細過之五言如神鴉追送客遠樹靜含江月斜高馬影風急失人聲湖添新歲水人滯去年丹風橫帆上下



岸斷纔高低。漢水連湖址。君山抱嶽回。七言如赤壁。  
云山月照人。橫鐵梨秋風。吹客唱銅琶。宿江州云潯。  
陽雁過楓初冷。廬岳峰寒雪未清。闌門云秋水樓臺。  
花滿寺。春風輿馬路通橋。寄人云鱸香笠澤蓴新長。  
酒熟金陵絮正飛。早梅云香乍入簾。猜不定。影初承。  
日寫難工。春曉云蒲團蝶擁花參佛。竹墅鶯邀茗醉。  
人無題云。犀角到尖看透。量麝臍乍擘得生香。石中。  
玉嫩初分璞。淵底珠團欲結胎。熟到櫻桃常欲哂。嫩。  
於芍藥。肥初開。野寺云紅芭蕉藏白蝙蝠。碧枕椰綴。

青葡萄

朱少尉豔體詩

甘肅朱香生少尉詩筆清麗以目疾罷官僑遇星沙  
與湘中人倡和極多尤工豔體詩香草美人騷客作  
賦茲錄其效李義山七律八章詩云蘋藻儀型衆望  
歸在公何事總無違心知別殿成尤物眼看烽臺起  
禍機辭螯儘誇身教肅脫簪終恨諫書稀酬恩只有  
龍鍾淚長流君王舊賜衣選侍昭陽禍已胎傾城姿  
貌更多才心如珠轉圓無滯舌有蓮花妙半開飛燕

縱能危漢祚。西施何事到蘇臺。白頭宮女知幾早。獨  
抱龍萊怨鳩媒。思君共賦采蘋歌。香輦催人可奈何。  
馬媛有心當猛獸。木蘭無語假明駝。一春花信風難  
測。萬里瓊樓夢易訛。擬織回文重寄語。十年衫袖淚  
痕多。懷清臺上月初圓。巴婦清操遠近傳。煮井夜明  
千竈火。勸畊春履一塍烟。才能守富完高行。身冒憑  
媒乞小憐。祇恨美人風韻少。秦箏差不似虞絃。啣雪  
餐霞性最孤。柳梢蹤跡卻模糊。絕無脂粉隨同伴。偏  
有羹湯奉小姑。斷臂行高誠共見。露筋名重敢疑誣。

清虛獨愛姮娥影。照向泥岑總不污。檀車寶馬到長  
安。國色仙香冠上闌。琬玉名高招妒易。開天妝舊入  
時難。誓封永巷春無主。雨閉長門夜獨寒。賴是繡餘  
鴛譜在。精心留付後人看。笑下蓬山步十洲。燒鉛合  
汞幾春秋。能拋靈藥頒雞犬。肯向銀河羨女牛。世外  
茗華深鑊玉。人間形影任登樓。天寒始信幽栖樂。多  
少蛾眉誤蹇修。昭容才貌美無加。倚色和戎計太奢。  
馬上琵琶工作態。酒邊歌舞不思家。縱教冒頓親翁  
主。未必劉郎重麗華。什載陳留嬌女懺。最難消遣是

邊笳香生自注云義山無題之作皆有所託非艷情也。幽居多感。因仿爲之。寄興無端。屬辭多排。有心者讀之。當不謂我驕耳。香生又有句云。胡廣本來宜富貴。楊修何苦太聰明。亦妙。殆卽無題詩之微旨耶。憐其目不見物。尙有此一枝好筆。亦異才也。

### 董逃行

陸放翁集中有董逃行一篇。悲壯淋漓。實能于李杜韓蘇外自闢一境。足爲千古炯戒。詩云。漢末羣盜如牛毛。干戈萬葉更相鏖。兩都宮殿摩雲高。坐見霜露

生蓬蒿魁赫赫起臨洮僵尸自照腦中膏危難繼  
作如崩濤王朝荒蕪誰復薊踰域散走墮空壤扶老  
將幼山中號昔者羣狂根株牢眾憤不能損秋毫誰  
知此亂亦不遭名雖放斥實遁逃平民踣死聲磔磔  
今茲受禍乃我曹命意深遠殆指靖康之變誤國諸  
姦倖免者多也不料明季之復蹈覆轍其慘更甚也

板橋詞

鄭板橋詞云十年蓋破黃紬被儘嘗徧官滋味雨過  
槐廳天似水正宜潑茗正宜開釀又是文書累 坐

堂一月吆呼碎衙子催人粧傀儡執法平情然也未  
酒闌燭跋漏寒風緊多少雄心退調寄青玉案閱此  
詞想見作令之難然以一官在署尙可以潑茗開釀  
仍有自公退食之趣蓋板橋所宰范縣是中簡之區  
也若煩要之區其苦更甚矣近日候補各官清苦無  
聊之况惜無人詠及

鄭比部感遇詩

廣東巡撫郭中丞特疏薦象州鄭小谷比部時比部  
老矣賦感遇詩呈中丞不作出山計矣詩云鴛鸞天

上鳴何急。鷗鷺江干寂不聞。少室忽傳徵李渤。小生  
真欲吏朱雲。囊書閒有售驢券。賦筆原無磔鼠文。周  
黨彈章譙秀薦。非驚非喜任云云。魏公不强雲卿起。  
介甫能招常秩來。一樣取人分進退。千秋知己各低  
徊。鴻冥縱戀南村宅。鶚薦終銜北海杯。莫謂小臣甘  
偃蹇。幾回雲際望蓬萊。谷口躬畊髯久華。林宗賞鑒  
語何夸。自驚文舉知劉備。人笑桓溫賀孟嘉。老去功  
名原小草。秋來顏色負黃花。撫心竊慰捫心感。西望  
長安日已斜。公然一疏列丹墀。不減三詩詠素絲。薦



士文章方露布。徵君名士已風馳。縱非知我如劉尹。  
何異逢人說項斯。養邃學深通治體。誤他月旦品題  
詞。近來保薦徧遐邇。大半知交出貴游。相馬縱能空  
冀野。登龍原未識荊州。門生禮合終身執。國士恩難  
異日酬。贏得人閒傳盛事。少微星接五諸侯。大吏求  
才需及時而薦之。朝廷及時而用之。庶收得人之  
效。如小谷壯年入仕。自揣不合時宜。拂袖而歸。不得  
已以詩文寄意思。略有表見於世。及其著述成而才  
名著亦已老矣。識者惜其遇郭公之晚也。

田園雜興

文待詔

徵明

田園雜興詩云土膏欲動雨頻催萬草

千花一餉開。舍後荒畦猶綠秀。鄰家鞭笋過牆來。寒  
食花枝插滿頭。紅裙青袂幾勾留。一年一度遊山寺。  
不上靈巖卽虎邱。吉月初開稻種包。南山雷動雨連  
宵。今年不欠秧田水。新漲看看拍小橋。槐葉初勻日  
氣涼。青葱鼠耳翠成雙。三公祇得三枝看。閒客清陰  
滿北窗。黃塵行客汗如漿。小住農家漱井香。借與門  
前盤石坐。柳陰亭午正風涼。諸詩樸野可愛。